

P.M.R.D. ka ɲaniyajira

Nowanburu kalo tile 19, 1968 san, sòròdasiw ka komite ye fanga ta faso ka hòrònyali kan kan. Nka a ma mèn jamana denw y'ù tégè da ko kisè kan : sòròdasiw ka komite ye faso yèlèma yòrònin kelen, k'a kè kasobonba ye, ka fanga fin sigi Mali denw da la.

An bè don min na i ko bi, sòròdasitile san tan ni saba ye Mali kè cogo di ? Jawulifanga, kòngò, fanga jalan, yuruguyurugu, nyani suguya bée de y'an ka jamana halaki, ka jamana denw bò u cogoya la. Nin dusuka-

siba in de ye Mali n'a den nyumanw bana, ka an danbe lanògò. Nka digi dan ye dènèn ye : faso jòbagaw nya-nini ban tuma sera ! O de siratigè la, politikitòn kura min dilala faso lafasabaga dòw fè, n'a tògò ye ko PMRD, o b'a ɲaniya jira ka nyèsin faso kanubagaw bée ma, minw y'ù seko damajira kè an ka jamana kunnawololi la — izininabaarakèlaw, cikèlaw, baganmaralaw, hakililabaa-rakèla ni sòròdasi fasoden nyumanw, lakòlikaramògòw ni lakòlidenw —, walasa an bée bè jè

ka fèerè nyini ka fanga fin ni jawulifanga ban jamana kònò, ka Mali yiriwa hòrònya na, ani hadamadenya ladamuli sira kan.

O waleyaba tè se ka sabati n'an ma an hakililaw jira nyògòn na : **jèkafò ye daamu ye.** PMRD b'a miiriyaw da jira aw la nin sèbèn in na, nin ko saba kan : an ka jamana kèra min ye bi, a tun bè cogo min sanni sòròdasiw ka fanga ta, ani an kuntilenna ye min ye Mali ka nyètaa la, n'o ni Musa Tara-wele ta tè kelen ye.

Mali, k'a ta 1960 san ka n'a bila 1968 san

K'a ta 1946 san ka n'a bila 1968 san, RDA mògòw ye faso jòbaaraba de kè, an ka jamana n'a denw tè se ka nyina min kò :

— u ye faso ka hòrònya n'a ka yèrèta kèlè kè
— u ye ɲaniya siri ka Mali yiriwa hòrònya na, ka jamana denw bée damakènyè sòrò la ani hadamadenya ladamuli la ; o ɲaniya, n'o bè wele sosiyalismu, o tun ye ɲaniya nyuman ye

— u ye Mali izini fòlòw jò
— an ka sekow n'an ka dònkow, an ka ko kòrò minw tun lagosira tubabuw fè, u y'olu don da la, ka miiriya kura di Mali denmisènninw ma, ka faso kanu sinsin bée dusu la, ka Mali denw nyè yèlè jamana tòw ka hòrònya kèlè kan.

Nka RDA ka nin waleyaba in ma se ka jiidì, sabu nyèmògòw yèrè cè la, ɲaniya nyuman min fòra, o tun ma se bée kònò. Ani fana fili caman kèra a tiimèli sira kan. Nyèmògò dòw ma

sira nyuman jira : u y'ù ta kè nafolonyini ye, ka jama tòrò, ka jamana denw nisòndiyalen jigi misènya. O bòlen kò yen, Mali tun ye hòrònya sira min ta, tubabuw tun ma **dinyè n'a ye fiyewu : u ye jamana sirijuru gèlèya n'ù ka yuruguyurugu ye.**

Nin bée lajèlèn faralen nyògòn kan, o ye tinyèni don jamana kònò, ka jamana denw di sègènba ma. O de kèra sababu ye ka sòròdasiw ka fanga tali nògòya.

Mali, k'a ta 1968 san ka n'a bila bi la

Sòròdasiw ka komite ye fanga ta Nowanburu kalo tile 19, 1968 san, ko jamana denw tòròlèn bè, jamana sòròdaw tè yiriwa. **Nka suko ni dugujè cè, komite mògòw ye jamana koron, ka politikiko bée dabila, ka baarakèlaw ka tòn ci, ka tòrò da Mali denw kan, u ma min nyògòn ye dinyè na.** Faama kuraw ma se k'ù na kun dogo : u y'ù ta kè nafolobanyini ni forobanafolo dunni ye ; **RDA tun ye fèn o fèn kè, ka jamana denw dèmè, ka Mali kunnawolo, u y'ò bée lanògò, ka faso nafolo yèrèkè ; ka na fanga jalan sigi Mali denw da la tilesekuncè.** Mali cè n'a muso, bée hakili bè Cèkòrò n'a jènyògònw ka kèwale juguw la. Wa u ka minèli ma kè faso kanu kosòn dè ! Faso juguw ni nyògòn cè kèlè tun don. Sabu, u minènen kò, tòrò tile ma ban : jawu-

lifanga ma ban, fanga jalan ma ban, nanbara ni yuruguyurugu ma ban. **Politikitòn kura min dilala, ko UDPM, a ma foyi yèlèma Mali kow la.** A kèra i ko fini de, k'a biri komite kòrò ka fanga fin kan. **Komite kòrò mògòw, jalatigi ni forobabaarakèla minw ci ye yuruguyurugu ye, kènyèrèye minw sirilen bè jamana wasalenw ka wari la, olu de ta ye Mali ye bi.** Min ka d'ù ye, u b'ò de kè jamana kònò. U ye faso kè lenburuba ye k'a bèn u kelen da ma, ka faso den nyumanw to gèlèya ni nyani na : **dò bè si kòngò na, dò bè tosira gan.** U y'ù ka mògòw bila faso ka foròba iziniw ni jagokèdaw kun na, u n'ù bè jè ka forobanafolo dun piya ! U ye kòori-sènè ni tigasènè yiriwa, jamana wasalenw sago la, ka nyò ni malo sènèni nagasi, ka Mali denw

lakòngò, ka tila k'ò turu da ja kun. U ye faso ka lakòliko tinyè bògò-bògò, ka Mali lakòlisow kè faama-denw ta ye. 1979 ni 1980 sanw na, u ye lakòliden baa tan ni wòrò ka sansabakalan latinyè ; ka fila faga fu, k'ù bònè u ni la : Abudulu karimu kamara, denmisènninw ka nyèmògò min fagara faamaw fè gosili bolo, ka tila k'a ka suko kè bée nyinèma, k'a ka kaburu fana dogo bée la ; ani Cokari, n'ò fagara Moti.

Bi bi in na, faso den nyuman minw tun y'ù jigi da sòròdasiw ni UDPM ka nin fanga in kan, u bée jigi karila : **finyètòberefanga de bè Mali denw kun na bi, o ma dogo mògò si la.** Faantanw tòròla, Mali fanba nyanina. **Wa maa o maa da bè se o kuma ma, o tigi bè sèbèkòrò nyangi.** A fò nin ko in bè se ka to ten ?

An kuntilenna Mali ka nyètaa la

PMRD ko cogoya si de la jamana den nyumanw man kan ka faso bila ka taa woyo fè ten ! Wajibi ye fèerè sèbèw tigèli ye, ka Mali bila sira nyuman kan, k'a yiriwa, k'a denw bée wasa, yèrèmahòrnya ani hadamadenya ladamuli sira kan. O la, faso lafasabagaw ka kan k'u cè siri ko kèrènkèrènnen dòw la.

Jamana kunko kuma la

Bèe ka se k'j fèla fò faso kunkankow la. Min b'a fè ka politikitòn dila o siratigè la, o k'o kè. Baarakèlaw ka se k'u danmajèkulu dila k'u yèrè lafasa, ka sòrò fanga sen t'a la. Wa jamana ka sariyaba ka sòn nin bée lajèlen ma, k'a lasabati. O siratigè kelen na, yèlèma ka don jamana mara cogo la, ka fanga kè faso jòbagaw bée jè ye.

Jamana sòròdaw yiriwali ko la

Sòròdabaw, baarakèdabaw, faso tè sèbèkòrò jò minw kò, olu ka bila forobabolo kan. Wa kènyèrèyew jò yòrò jamana jòli la, o ka pereperelaticè, u kana balo forobanafolo la. Fèerè minw bée tigè ka jamana yiriwa, olu ka kè faso jòbagaw bée lajèlen ka fèerè tigèlenw ye. Dèmè ka don cikèlaw, baganmaralaw ani mònnikèlaw bée ma, u ka sòrò bée yiriwa cogo min, sabu olu de bée faso labalo. Jamana yèrè ka wari dilalen y'a ka hòrònya taamasiyèn dò ye : o la, Mali k'i jija k'a ka wari sabati, ka bò jamana wasalenw ka jònya la.

Hadamadenya ladamuli ko la

N'i y'a ye i bée baara kè, i ka kènè de. Faso denw bée ka damakènyè fura-

kèli la an'u kisili bana ma. Faantanden ni faamaden bée ka damakènyè fana lakòlilataga ni baarasòrò la.

Faso jòbaga fanga y'a danbe ye. An danbe b'an ka sekow n'an ka dòn-kow la, an ka kanw y'olu dòn-sira ye. O la, an ka kanw ka don da la an yèrèw fè, ka bila tubakukan nò la yòrò bée, baaradaw ni lakòliw la, kunnafonidi yòròw bée la.

Jamana denw bée ka dege an ka kanw sèbènni n'u kalanni na, k'u bò kalanbaliya dibi la pewu.

Nin de ye PMRD kuntilennaw ye, PMRD, n'o ye izininabaarakèlaw, cikèlaw, hakililabaarakèla ni sòrò-dasi faso den nyumanw ka tòn ye.

O kuntilennaw tè sabati fiyewu, ni faso den nyumanw bée m'u bolo di nyògòn ma, ka Musa Tarawele n'a ka maaw ka fanga jugu kèlè.

Tunbutu,
Nowanburu kalo tile 19, 1981 san
P.M.R.D.

P.M.R.D. ka Wele ka nyèsin faso lafasabagaw bée ma

Mali denw bée sègènba de la bi faso kòndò. Kunun, an ka jamana de tun ye Farafinna tilebi ka jiginèba ye. Bi, kòngò ni minnògò bée Mali fanba la, kelen kelenninw kòndò falen : nka Mali den nyumanw nyaninen bée bi sa !

Nin kòngò in tè jà nò ye dè : faso nafolo latinyèni an ka nyèmògòw fè, o de nò don. Gèlèyaba min bée jamana kòndò bi, sègènba min bée Mali denw na bi, an ka bi faamaw ko sanjinabaliya don, ko dinyè jamana wasalenw yèrè ka gèlèya finyè de bée ka se an ma : o si tè tinyè ye ! Faamaw yèrè de ye jamana halaki n'u ka tulon ni manamanakokè ye ; ka tila k'u ka filennin ta ka taa saraka deli jamana wasalenw da la, faso den nyumanw tògò la. U dun y'an danbe lanògò koni, fo lanògò kojugu! Suko ni dugujè cè, ka an ka nin jamana kunkòròtalen, n'a den kisèw bée kun masuli : ka mali ci kè dèmènyini ni sarakadeli ye dinyè fan tan ni naani fè.

UDPM ka fanga tè dò wèrè ye Musa ka komite kòrò ka fanga dogolen kò. Wa o fanga sigilen bée mògòw jawu-lili de kan, ani fanga jalan, ni nanbara, ni yuruguyuru.

Mògòkelenfanga sabatira jamana kòndò. Mògò o mògò k'i b'i fèla fò, n'a ma taa Musa n'a ka mògòw jiminsira fè, o tigi bée sèbèkòrò nyangi.

Balo, kènèya ni kalan ye faamalamògòw ta ye, ka sòrò jamana fanba tòròlen bée kòngò, bana ani kalanbaliya bolo.

Digi dan ye dènèn ye : faso den nyumanw nyanini ban tuma sera !

O sababu la, PMRD bée wele kèrènkèrènnen bila ka taa faso lafasabagaw bée ma, cikèlaw, baganmaralaw, izininabaarakèlaw, sòròdasiw, lakòlikaramògòw ni lakòlidenw, forobaarakèlaw ni kènyèrèyew, mògò o mògò, i kèra politikitòn na wo, i ma k'a la wo, n'a y'a sòrò i hami ye faso ka nyètaa ye, a kunnawololi n'a hòrònyali, ani faso den nyumanw

bée lajèlen labaloli n'u kunkòròtali ye, an bée ka wuli k'an cè siri jèkulu kelen kòndò, ka Mali sòròdasifanga jugu in kèlè ; ka fèerè kè walasa faso nafolo dunny faamaw fè ani Mali tulu bòli jamana wasalenw fè, o bée bée dabila cogo min, walasa an ka jamana bée bò nògò la.

Gèlèya ni nyani selen bée yòrò min jamana kòndò, jèkulu in nafa fò kun tè : faso kunnawolo jèkulu don.

Faso lafasabagaw, an ka jè ka faso juguw kèlè, ka fanga kura sigi min bée jamana sòròdaw bée yiriwa, k'u lakana, ka faso jòbagaw bée kènyè forobanafolo tilali la, ka Mali denw hòrònya, hadamadenya ladamuli sira kan !

Tunbutu,
Nowanburu kalo tile 19, 1981 san
P.M.R.D.